

ԱՔԴԻՈՒ

1

ԳԼՈՒԽ 1

Աբդիի տեսիլքը: Տէր Եհովան Եդովմին համար այսպէս կ'ըսէ. Տէրոջմէ լուր լսեցինք Ու ազգերուն դեսպան ղրկուեցաւ՝ ըսելով. «Ելէ՛ք ու անոր դէմ պատերազմի ելլենք»:

² Ահա քեզ ազգերու մէջ պզտկցուցի, ուստի Դուն խիստ պիտի անարգուիս:

³ Քու սրտիդ հպարտութիւնը քեզ խաբեց, Ո՛վ ժայռերու խռռչներուն մէջ բնակող Ու բարձր բնակարան ունեցող, Որ սրտիդ մէջ կ'ըսես՝ 'Ո՞վ գիս գետինը պիտի իջեցնէ':

⁴ Թէեւ արծիւի պէս բարձրանաս, Բոյնդ աստղերուն մէջ դնես, Քեզ անկէ պիտի իջեցնեն», կ'ըսէ Տէրը:

⁵ Եթէ քեզի գողեր կամ գիշերային աւազակներ գային (Ինչպէ՛ս կործանեցար) Անոնք իրենց բաւելու չափ պիտի չգողնայի՞ն: Եթէ քեզի կթողներ գային, Միթէ ճիւղեր պիտի չթողուի՞ն:

⁶ Եսաւ ինչպէ՛ս քննուեցաւ. Անոր ծածուկ տեղերը խուզարկուեցան:

⁷ Քու բոլոր դաշնակիցներդ քեզ մինչեւ սահմանը ղրկեցին, Քեզի հետ խաղաղութիւն կնքող մարդիկը քեզ խաբեցին Ու քեզի յաղթեցին: Քու հացդ ուտողները քու տակդ որոգայթ լարեցին: Անոր քով հանձար չկայ:

⁸ «Ահա այն օրը, կ'ըսէ Տէրը, Եդովմէն իմաստունները Ու Եսաւին լեռնէն հանձարը բնաջինջ պիտի ընեն:

⁹ Քու կտրիճներդ, ո՛վ Թեման, պիտի զարհուրին, Որպէս զի Եսաւին լեռնէն ամէն մարդ սպաննուելով կոտորուի»:

¹⁰ «Քու եղբօրդ Յակոբին եղած անիրաւութեանը համար Ամօթը քեզ պիտի ծածկէ Ու յաւիտեան բնաջինջ պիտի ըլլաս:

¹¹ Անոր դէմ կայնած օրդ, Երբ օտարազգիները անոր զօրքը գերի առին Ու օտարները անոր դմենը մտան Ու Երուսաղէմի վրայ վիճակ ձգեցին, Դո՛ւն ալ անոնց պէս ըրիր:

¹² Ու պէտք չէր որ՝ քու եղբօրդ օրը, Անոր օտարութեան օրը, անոր նայէիր Եւ Յուդայի որդիներուն վրայ՝ Անոնց կորուստին օրը՝ խնդայիր Ու անոնց նեղութեան օրը Քու բերանդ մեծցնէիր:

¹³ Ո՛չ ալ իմ ժողովուրդիս դուռը՝ Անոնց թշուառութեան օրը՝ մտնէիր, Անոնց կործանումին օրը Դուն ալ անոնց չարիքին վրայ նայէիր Եւ անոնց կործանումին օրը Անոնց ստացուածքին վրայ ձեռք դնէիր

¹⁴ Եւ ո՛չ թէ անոր ազատուածները կոտորելու համար Ճամբուն բերանը կայնէիր Ու անոր նեղութեան օրը Անոր մնացորդները մատնէիր»:

¹⁵ «Քանզի բոլոր ազգերուն վրայ Տէրոջը օրը մօտ է: Քեզի քու ըրածիդ պէս պիտի ընեն. Քու հատուցումդ գլուխդ պիտի դառնայ:

¹⁶ Քանզի ինչպէս դուք իմ սուրբ լեռանս վրայ խմեցիք, Բոլոր ազգերն ալ շարունակ պիտի խմեն. Պիտի խմեն ու պիտի կլլեն Ու չեղածի պէս պիտի ըլլան»:

17 «Բայց Սիօն լերանը վրայ փրկութիւն պիտի ըլլայ Եւ սրբութիւն պիտի ըլլայ: Յակոբին տունը իրենց կալուածներուն պիտի տիրեն:

18 Յակոբին տունը՝ կրակ, Յովսէփին տունը՝ բոց Ու Եսաւին տունը յարդ պիտի ըլլայ: Անոնց մէջ պիտի բռնկին, Ջանոնք պիտի ուտեն Ու Եսաւին տանը մնացորդ մը պիտի չըլլայ, Քանզի Տէրը խօսեցաւ:

19 Եւ հարաւայինները Եսաւին լեռը պիտի ժառանգեն Ու դաշտայինները՝ Փղշտացիներուն երկիրը, Նաեւ Եփրեմին դաշտը ու Սամարիային դաշտը պիտի ժառանգեն: Բենիամին Գաղաադը պիտի ժառանգէ:

20 Իսրայէլի որդիներուն այս գերի զօրքերը Քանանացիներուն ունեցածը պիտի ժառանգեն մինչեւ Սարեփթա: Երուսաղէմի գերիները, որոնք Սեփարադի մէջ են, Հարաւային քաղաքները պիտի ժառանգեն:

21 Ազատուողները պիտի ելլեն Սիօն լեռը՝ Եսաւին լեռը դատելու համար Ու թագաւորութիւնը Տէրոջը պիտի ըլլայ»:

For other languages please go to www.wordproject.org